

松江府志卷五十

古今人傳二

唐

陸元感字達禮士季孫也父謀道周王府文學詳正殿學士善班固漢書元感生而敏慧傳其家學解褐參韓王府軍事除婺州龍邱丞遷建德歷陽二縣令咸有善政加朝散大夫護軍行黃州司馬唐書

顧道衍字正平野王之孫開元中舉進士又登文學優贍科仕為湖州司功參軍廉平惠愛獄簡訟息民稱焉後

棄官歸吳築室奉母

陳志賢達

松江府志

卷五十

古今人傳二

一

陸南金士季孫元感子貞觀中為太常奉禮郎歷鄞令築隄為湖千頃開元初少卿盧崇道抵罪徙嶺南逃還東都南金居母喪崇道偽稱弔客突入南金舍而道其情南金匿之事覺詔御史捕按南金當重法弟趙璧自言匿崇道者我也請死南金固言弟自誣不情御史怪之趙璧曰母未葬妹未歸兄能辦之我生無益不如死御史驚上狀帝遂皆宥之南金知書史操履謹飭張說陸象先稱其賢授庫部員外郎以痼疾改太子洗馬卒唐書陸贄字敬輿嘉興人父侃為溧陽令十八登進士第中博學宏辭調鄭尉罷秩東歸省母路由壽州刺史張鎰有

重名贄往見語三日奇之請爲忘年交旣行餉錢百萬  
曰請爲母夫人一日費贄不納止受茶一串而已又以  
書判拔萃補渭南尉德宗立遣黜陟使行天下贄說使  
者請以五術省風俗八計聽吏治三科登俊又四賦經  
財實六德保疲瘵五要簡官事時皆躡其言遷監察御  
史召爲翰林學士會馬燧討賊河北久不決請濟師李  
希烈寇襄城詔問贄策帝不納從狩奉天機務闡總遠  
近調發奏請報下詔書數百贄若不經思逮成皆周盡  
事情衍繹熟復人人可曉旁吏承寫不給他學士筆閣  
不得下而贄沛然有餘始帝播遷府藏委棄衛兵無褚

衣至是天下貢奉稍至乃於行在夾廡署瓊林大盈二  
庫別藏貢物贄上疏諫帝悟卽撤其署遷諫議大夫仍  
爲學士孤立爲左右權幸沮短又言事無所回諱陰失  
帝意久之不得宰相但爲中書舍人母韋猶在江東帝  
遣中人迎還京師俄以喪解官客東都諸方賄遺一不  
取唯韋皋以布衣交先以聞故所致皆稱詔受之又詔  
中人護父柩自吳葬洛陽服除權知兵部侍郎復召爲  
學士眷遇彌渥天下屬以爲相而竇參素不平忌之贄  
亦數言參罪失貞元七年罷學士以兵部侍郎知貢舉  
明年參黜乃以中書侍郎同中書門下平章事班宏判

度支卒贄薦李弼帝自用裴延齡贄言延齡僻戾躁妄不可用不聽俄而延齡姦佞得君天下仇惡無敢言贄上書苦諫帝不懌竟以太子賓客罷贄本畏慎未嘗通賓客延齡揣帝意薄讒短百緒帝怒欲誅贄賴陽城等交章論辯乃貶忠州別駕後稍思之會薛延爲刺史諭旨慰勞韋皋數表請贄代領劍南帝猶銜之不冝與順宗立召未至卒年五十二贈兵部尙書諡曰宣始贄入翰林年尙少以材幸天子常以輩行呼而不名在奉天朝夕進見然小心謹慎未嘗有過由是帝親倚至解衣衣之同類莫敢望雖外有宰相主大議而贄嘗居中參

裁可否時號內相嘗爲帝言今盜徧天下宜痛自咎悔以感人心昔成湯罪己以興楚昭出奔以一言善而復國陛下誠不吝改過以言謝天下使臣持筆亡所忌庶叛者革心帝從之故奉天所下制書雖武人悍卒無不感動流涕後李抱眞入朝爲帝言陛下在奉天山南時赦令至山東士卒聞者皆感泣思奮臣是時知賊不足平也議者謂興元戡難雖爪牙宣力贄與有功焉其從狩山南也道險澀與從官相失夜召贄不得帝驚且泣詔軍中得贄者賞千金久之上謁帝喜見顏閒自太子以下皆賀及輔政不敢自顧重事有可否必言之所言

皆拂帝短懇到深切或規其太過者曰吾上不負天子  
下不負所學而已皇它卹乎旣放荒遠嘗闔戶人不識  
其面又避謗不著書地苦瘴癘祇爲古今集驗方五十  
篇示鄉人云子簡禮登進士第累辟使府新舊唐書  
按顧志宣公  
父灞未知何  
據今依本傳

陸明允字信夫贊從子元和三年以集賢校理出爲奉化  
令悃悃無華視民如子屬歲大旱鄰境人相食明允輯  
和其民振廩食以餼餓者全活數萬人治行爲天下第  
一復於龍潭溪壘石障水鑿引流下通廣平湖達於江  
漑田數千頃後名其堰曰資國渠曰新河至今賴之在

松江府志

卷五十

古今人傳二

四

邑五年卒

陳志  
賢達

顧謙字自修其先吳郡人丞相季歷之後風神朗秀質性  
端敏舉明經三禮二科洞達貫穿魏帥何公表謙高才  
拜貝州宗城令尋棄歸隱居北平鄉崧子里名流高其  
風操成就見焉咸通某年卒顧志  
名臣

丁公著字平子居胥浦祖衷父緒皆不仕三歲喪母七歲  
見鄰母抱其子哀感不食年二十一五經及第明年又  
舉開元禮授集賢校書郎秩未終歸侍鄉里不應請辟  
居父喪躬負土成墳貌力癯憊見者憂其死孝觀察使  
薛華表聞詔賜粟帛旌其門淮南節度使李吉甫慕其

才行薦授太子文學兼集賢殿校理吉甫自淮南入相  
廷薦其行卽日授右補闕遷集賢直學士尋授水部員  
外郎充皇太子及諸王侍讀著皇太子及諸王訓十卷  
轉駕部員外仍兼舊職穆宗卽位未及聽政召居禁中  
詢訪朝典以宰相許之公著陳情詞意極切超授給事  
中賜紫金魚袋未幾遷工部侍郎仍兼集賢殿學士知  
吏部選事公著知將大用以疾辭退不許因求外官遂  
授浙江西道都團練觀察使二年授河南尹皆以清靜  
爲理改尙書右丞轉兵部吏部侍郎遷禮部尙書翰林  
侍講學士上以浙西災寇詢求良帥命檢校戶部尙書

領之詔賜米七萬石以賑給浙民賴之改授太常卿以  
疾請歸鄉里未至而終年六十四著禮志十卷

陳志  
賢達

陸曇不知其人五茸志逸載其墓碑文曰陸處士曇字文

廣其先吳郡人也幼承嚴訓長有令望風義洋洋遠近  
欽矚經學至美筆法尤精不仕明時邱園樂道禍不讓  
善殲於哲人以開成元年寢疾至二年丁巳歲莫春之

月四日終於私第春秋五十有二

志石今在張  
澤種福庵中

陸辰字祥文曾祖禮殿中侍御史祖師德淮南觀察支使  
父鄴陝州法曹參軍徙家於陝遂爲陝人辰本名允迪  
光啓二年僖宗在興元舉進士第一進翰林學士中書

舍人屬辭敏速若注射然一時書命同僚以爲不及昭宗嘗於金鑿作賦詔學士皆和展先就帝歎曰貞元時陸贄吳通元善內廷文字後無繼者今朕得卿斯文不墜矣與宗人希載文才重德名冠一時朝中號二陸累爲尚書左丞封嘉興縣男徙戶部侍郎貶峽州刺史久之授工部尚書從帝自華州還以工部尚書當國封郡公天復初朱全忠謀去朝廷衣冠貶展濮州司戶殺之於白馬驛年五十九

顧志名臣

宋

董乂字彥臣治平二年進士官魏王宮教授遞遷大理寺

松江府志

卷五十

古今人傳二

六

卿進樂書釋青囊經遷朝議大夫敷文閣待制封華亭縣開國男哲宗敕云典教王宮有忠孝勉旃之意司刑大理極寬恤剖決之仁累賜劄問且題門版云數封天

子詔兩代帝王師後自華亭徙德興

饒州府志

戴顯甫嘉興人嘉祐八年進士選亳州永城尉與舅氏杭州陶叔獻同舉進士陶登第纔旬月卒於京師顯甫扶舅喪歸葬舅妣攜子女還外家其母孫無所依迎養於

家

浙江通志

衛公佐字輔之其先汲縣人徙居華亭祖至有文行舉進士公佐被恩命授將仕郎官揚州助教母郁早卒事繼

母陳盡孝族有貧不能嫁女者雖疏遠必爲擇壻歸之聚書數千卷禮四方賢士教訓子弟時縣未有學捐地爲址又獨任禮殿之役熙寧末饑疫乃施粥給藥請邑僧靈敏輩分拯之瘞殍給棺無慮數萬邑大夫嘉其義將奏言之公佐辭曰某占籍上等恐爲盛德累療病送死僧行頗有力請以薦僧大夫義而從之元豐中復饑租稅無所出舊令秩滿代者已至轉運使苛留之使督逋負纍繫盈庭又爲出粟代輸釋繫者而舊令始得解去民相與踵門謝曰微君吾屬將死於縲縶矣年五十八無疾而卒前一日展先塋且徧謁親舊若與之訣者

松江府志

卷五十

古今人傳二

七

歸語家人曰我生樂善好施不爲不義今也云亡可無憾矣弟公亮公望竝敦行義其後子孫蕃盛終宋世膚

敏仲達文節皆其後

顧志節義

陳舜俞字令舉博學強記舉進士又舉制科第一熙寧三年以屯田員外郎知山陰縣詔俟代還試館職舜俞辭曰爵祿名器砥礪多士宜示以至公烏可爲期如付劑契繳中書帖上之青苗法行舜俞不奉令上疏自劾其略曰天下之有常平非能人人計口授餉但權穀價賤之柄使積貯者不得深藏以邀利爾今散爲青苗惟恐不盡萬一饑饉洊至必有乘時貴糶者將何法以制

之官制既放錢取息富室藏鏹坐待鄰里逋欠之時田宅妻孥隨欲而得豈不爲兼并利哉且使吾民歲輸息錢是別爲一賦以徹海內非王道之舉也奏上責監南康軍鹽酒稅五年而卒舜俞本家烏程自中年棄官歸居於郡之白牛村自號白牛居士蘇軾稱其學術才能兼百人之器著有都官集

通志參修峯  
泐先賢錄

章粹字仲容元豐時通判恩州百廢具舉適河流湍溢州人大恐粹增卑培薄迄以無虞樞密鄭居中疏薦之

通志

呂全嘉祐二年進士知臨海縣以政績聞時民役至七年

松江府志

卷五十

古今人傳二

八

始更全隨產高下爲久近民便之

赤城志參  
浙江通志

呂益柔字文剛別號松澤叟元祐三年進士官刑部侍郎

以朝議大夫顯謨閣待制致仕嘗撰妙悟大師碑銘書

船子和尙撥權歌重於時

宋碑

朱之純登元祐進士第以文名於時歸老西湖作湖齋谷

陽園自號谷陽先生

顧志  
文學

朱諤字聖與初名紱舉進士第二調忠正軍推官崇寧閒歷遷侍御史給事中以同黨籍人姓名改今名進御史中丞嘗奏請開內閣延羣臣從容論治道如神宗故事又請分命使者刺舉諸道有受令不行行而不盡者論



其罪則令出而朝廷尊俄兼侍讀徒兵禮吏三部尙書  
大觀元年拜尙書右丞卒贈光祿大夫諡忠靖

宋史

衛膚敏字商彥以上舍生登宣和元年進士第授文林郎  
南京宗子博士尋改教授六年召對改宣教郎祕書省  
校書郎命假給事中賀金主生辰膚敏奏曰彼生辰後  
天寧節五日金人未聞入賀而反先之失國體萬一金  
使不來爲朝廷羞請至燕山候之彼若不來則以幣置  
境上而已帝可其奏旣至燕金賀使果不至遂置幣而  
返七年復假給事中以行及慶源府逢許元宗還語金  
國事曰彼且大入其勢不可往膚敏至燕報愈急衆懼

不敢進膚敏叱曰吾將君命以行其可止乎旣至金國  
知其兵已舉殊不爲屈及將還金人所答國書欲以押  
字代璽膚敏力爭曰押字豈所以交鄰國論難往復卒  
易以璽及受書欲令雙跪膚敏曰雙跪乃北朝禮安可  
令南朝人行之哉爭辨踰時卒單跪以受金人積不說  
中道羈留且半年至涿州新城與幹離不遇遣人相約  
見拒之不可遂語之曰必欲相見其禮當如何曰有例  
膚敏笑曰例謂趨伏羅拜此禮焉可用北朝止一君耳  
皇子郎君雖貴人臣也一介之使雖賤亦人臣也兩國  
之臣相見而用君臣之禮是北朝一國有二君也金人

氣折始曰惟所欲膚敏長揖而入既坐金人出誓書示之膚敏卻不視曰遠使久不聞朝廷事此書真偽不可知因論用兵事又以語折之幾復爲所留靖康初始還進三官遷吏部員外郎會高麗遣使來賀命假太常少卿往接之朝論欲改稱宣問使膚敏曰國家厚遇高麗久矣今邊事方作不可遽削其禮失遠人心願姑仍舊乃復稱接伴使既至明州會京師多難乃便宜稱詔厚賜使者遣還建炎元年復命自劾矯制之罪高宗嘉賞選衛尉少卿建議兩河諸郡宜降蠟書許以世襲使各堅守陝西山東淮南諸路竝令增陴濬隍徙民入城爲

清野計命大臣留守汴京車駕早幸江寧帝頗納之遷起居舍人拜右諫議大夫兼侍讀上言行在頗興土木非所以示四方乞罷築承慶院昇陽宮又奏凡黜陟自中出者皆由三省乃得奉行或戾祖宗成憲者皆許執奏時內侍李志道以赦恩復保慶軍承宣使添差入內都知膚敏極論罷之初欽宗內侍昭慶軍承宣使容機圍城時乞致仕高宗卽位命起之膚敏言自古帝王未有求闈寺於閒退而用者遂寢后父邢煥除徽猷閣待制太后兄子孟忠厚顯謨閣直學士膚敏言非祖宗法煥尋換武職忠厚自若俄遷膚敏中書舍人膚敏懇奏

曰昔司馬光論張方平不當參知政事自御史中丞遷翰林學士光言以臣爲是則方平當罷以臣爲非則臣當貶今兩無所問而遷臣臣所未喻臣雖不肖願附於司馬光又言事母后莫若孝待戚屬莫若恩勸臣下莫若賞今陛下順太母以非法非所謂孝處忠厚以非分非所謂恩不用臣言而遷其官非所謂賞一舉而三失矣帝命宰相諭膚敏曰朝廷以次遷官非因論事也膚敏猶不拜居家逾月及忠厚改承宜使詔后族勿除從官膚敏始拜命又言中書根本之地舍人所掌不特演綸而已凡命令不合公議者率封還之會膚敏知貢舉

有進士何烈對省試策謬稱臣諫官李處遜乞正考官鹵莽之罪以集英殿修撰提舉洞霄宮或謂膚敏在省論事爲黃潛善汪伯彥所惡故因事斥之三年春召赴行在時帝次平江膚敏入見言及時事泣下帝亦泣曰卿今宜知無不言有請不以時對膚敏曰臣頃嘗三爲陛下言揚州非駐蹕之地乞早幸江寧今錢塘亦非帝王之都宜須事定亟還金陵因陳所以守長江之策帝善其言翼日再對歸得疾然猶力疾扈蹕至臨安俄除刑部侍郎未拜謁告歸華亭就醫許之遷禮部侍郎初膚敏久疾臥舟中不能朝時苗劉之變帝未反正宰相

朱勝非言於隆祐太后以膚敏稱疾坐觀成敗無人臣節及卒始明其非僞云年四十九特贈大中大夫子仲

英仲傑仲循宋史

朱彥美字師實知仁和縣姦頑斂迹凡徵租不遣一吏大署其門予之期趨令無一人後者除通判杭州守將悉以事委彥美每夜漏欲盡起秉兩炬據案閱訟牒數千百人立盡一郡稱治嘗陳便宜十餘條徽宗召見賜五品服除江淮荆湖兩浙等路制置發運判官先是蔡京用事罷轉般倉爲直達倉盡指藏錢廩粟爲羨餘以獻而六路漕船浮江絕淮沂汴累數月而後至吏卒冗食

松江府志

卷五十

古今人傳二

十一

其中度不能償則欠而沈之以險爲解或委空舟逃去歲亡十二三中都藏粟且盡彥美受命曰此直達之誤也今轉般倉法具載有司第付推行乃攷故事著科條蒐彌脫遺鉏治乾沒得緡錢累百萬宣和二年除京西轉運副使諸郡漕錢不輸於庫者八十萬往往懼罪自匿彥美飭錢所過州縣隨所見存者受之不幸而廢於水火盜賊者聽吾命於是送吏歡呼奔走徵逋貸償之盡輸所謂八十萬者又京西介居國右守將類多顯人怙貴不法至輦金幣署別籍儲之部使者無敢誰何而河防陵寢視他路爲劇每丐請於朝或移用他司錢佐

其乏而以負殿免者相屬彥美乘傳詣所屬州按簿書窮株穴得百餘萬釋逋負之在繫者量緩急輕重所宜爲施舍費出之節於是上下贍足奏課爲天下第一五年進直祕閣遂請老卒年八十

陳志賢達

柳約字元禮大觀三年以上舍第進士爲霸州教授徙睦州入爲辟雍正遷博士改宣議郎充廣親宅宗子博士約深於經學屬辭粹美大爲學者師慕提舉福建鹽事召對乞罷內外官到堂日投牒求官以厚風俗授祕書省校書郎進著作佐郎徽州司錄改通判宿州召拜監察御史靖康初兼權殿中侍御史論三鎮不可棄改尙

書工部員外郎進左司員外郎父憂去官服除以直顯謨閣充御營司參謀官遷太常少卿高宗將幸平江約疏言兵可進毋退以示怯於敵乃以直龍圖閣知台州未赴徙嚴州兼浙西兵馬都監節制管內軍馬當是時金人大入杜充擁衆北去列郡震恐莫有奔問官守者約於橫潰中屹保孤城悉力捍禦境內安堵慨然上書請糾合諸郡克復吳會上嘉其忠進右文殿修撰守郡如故詔以軍興費出無藝吏慢弗虔柳約獨謹賦輸率先程督進秩一等又詔約郡當兵衝而能不辭難不避事益嚴列柵保綏一方朕甚嘉之其以約充集英殿修

撰召入對獎勞再三擢權戶部侍郎約感激益盡言凡  
例外宣索皆執奏不進論吳开等罪未正非所以厲臣  
節諸大將提兵入覲各名其家將有尾大不掉之患皆  
人不敢言者又言軍興科需百出請令官戶名田過制  
者與編戶均一科輸請增諸路酒錢其半令提刑司椿  
管以備軍費皆從之會高麗請修貢議遣使報聘上顧  
廷臣無出約右加試戶部侍郎充其選行大用當路忌  
之諷言者誣以事罷為提舉太平觀居七年復祕閣修  
撰金人歸侵疆起知蔡州被命而往一無顧避既而金  
人渝平傳檄河南守臣皆舉城降約獨遣使數輩於武

松江府志

卷五十

古今人傳二

古

昌得報而後返未幾以敷文閣待制食祠祿十有五年  
卒贈四官約天性至孝母病甚泣禱於天願損壽以益  
親壽母尋愈約竟先母兩月卒

宋史

衛仲達初名上達字達可大觀三年登進士第徽宗改今  
名為館職日嘗上書諫修三山石橋不報後官至吏部

尚書卒

至元嘉禾志  
參顧志名臣

任盡言字元受右正言伯雨之孫與兄質言同登紹興二  
年進士第居下僚好慷慨論事秦檜死朝廷懲言路壅  
塞之弊召湯鵬舉於外為臺官盡言投啓賀之有每愧  
朱雲之請劍未聞林甫之斲棺云云鵬舉袖以白上上

意頗同始黜檜姻黨釋趙鼎子汾及李孟堅王之奇等  
自便公道大彰盡言之力也通判平江除京西運判改  
淮東提舉欽廟上升盡言率搢紳為位佛宮哭臨疏文  
二通讀者感泣啓與疏岳珂皆載之程史謂其義不忘  
君直不蔽姦忠信之至惜不究其用云著小醜集顧志名臣  
張伯垓佚其字登紹興第官至尙書顧志名臣  
潘緯字仲寶一字景緯紹興十五年進士恬於進取乾道  
中教授安慶軍嘗撰柳文音義吳郡陸之淵序之顧志文學  
陳伯達與潘緯同榜進士其學深於經術尤於洪範有心  
得通志

松江府志

卷五十

古今人傳二

十五

姚述堯字進道紹興二十四年第進士未冠讀書蕭寺日  
買二蒸餅詰旦予童僕人問之曰夜讀母恐飢令食蒸  
餅縱不飢敢忘母命乎與張橫浦九成施彥執德操葉  
先覺某同志契合橫浦有詩云環顧天地間四海惟三  
友謂彥執先覺述堯也著有蕭臺公餘詞一卷金山志按宋  
林景祥雲間進士題名碑於是科祇載錢良臣徐銳衛  
稷三人無述堯雲間志進士題名亦同金山志所載未  
知何據

錢良臣字友魏紹興二十四年進士淳熙五年繇給事中  
除端明殿學士簽書樞密院復除參知政事德望端偉  
為時所重九年罷政事除資政殿學士奉祠尋知鎮江

府職事修舉又除端明殿學士改知建康府兼行宮留  
守拜資政殿大學士二十五年請罷提舉洞霄宮光宗  
時卒諡文惠孝宗嘗詢時事所陳合上意孝宗褒之曰  
如卿真所謂通世務之儒遂書通儒賜之

通志參顧  
志名臣

許克昌字上達紹興三十年舉進士名在第一以有官改  
第二累官右正言時松江新涇塘爲海潮衝突鹹水內  
灌覃及嘉湖二境克昌請於朝移堰入運港以避潮勢  
由是三州之田獲免鹹潮之患鄉邦德之

顧志  
名臣

朱端常父繹之字貴言乾道二年進士知常州端常博雅  
能文登淳熙八年進士第嘉定閒知延平州政尙寬和

松江府志

卷五十

古今人傳二

六

祀延平名宦又與同郡胡林卿林至同修雲閒志歷官

尙書

陳志  
賢達

蓋經字德常高宗紹興閒由舍選登甲科官至中大夫戶

部侍郎

至元嘉  
禾志

衛涇字清叔其先齊人唐末避亂南遷居秀州之華亭祖  
闡政和八年進士父季敏通判鎮江府涇少有志操從  
永嘉李去智學李卒爲制服執喪人咸義之淳熙十一  
年擢進士第一授承事郎添差鎮東軍簽判涇以對策  
嘗陳添差之弊上表乞待次上特從其請故事狀元初  
任垂滿必通謝宰執始頌召命時正淮秉政涇不通謝



被召三月不得見十四年除祕書省正字輪對言陛下  
卽位之初銳意事功不次用將相痛憤以圖恢復二十  
六年之久無一事少稱陛下意者而陛下大有爲之意  
亦少弛矣一祖八宗之業太上皇付託之重子孫億萬  
年之基緒陛下一身任之豈可僅取苟安無事而遂已  
邪庸常之材持祿保身而風俗日壞士氣日卑民生日  
困臣恐天下之患將有出於慮之外者事幾易失時  
不再來願陛下堅自彊之志振綱維以張國勢作氣節  
以厲偷惰則靜可以彊根本動可以復土疆而事功立  
矣光宗初立政尙循謹涇以著作佐郎賜對言今日風

俗頹靡百度縱弛人才削弱國勢未張汲汲有爲尙恐  
不濟若猶因循其弊將至於不可爲者矣又言中國名  
爲息兵實則觀釁復讎之志直須時耳今自紹興來五  
十年無大戰自隆興來三十年無小鬪閒隙之生遠不  
過五六年願陛下奮發英斷規恢遠圖臥薪嘗膽不忘  
中原聖志先定然後與二三重臣講求大計重任而責  
成之內治外備則大仇可復中興可期又言自陛下踐  
祚臺諫給舍多不得其職今日士氣向衰風采銷落陛  
下所當長養振作而反陰消沮之將使羣臣上懼陛下  
之威命下虞羣小之中傷苟且成風諂諛充位脫有大

姦巨害誰爲陛下言者紹熙元年遷著作郎兼司封郎官二年正月震電兩霜大雪繼作涇應詔上封事言雷陽也雪陰也陽氣方升而陰制之此雪所以降也以象類而求則君欺於臣夫陵於妻小人害君子皆陰勝陽之證也有一於此皆能致亂陛下不可不豫防也時佞幸漸肆李后悍妒故涇以爲言出爲淮東浙東兩路提舉慶元初召爲尙書右司郎官論壽皇孝養禮曠以爲太上之於陛下親父子也天性之愛血氣之屬慈孝之親宜無毫髮疑問雖太上疾勢未平語言舉動若未容於進見者然陛下孝心純篤豈以吾親之不可見而遂

已乎願陛下兢業於中以親之未順爲憂以期於見親爲念積此誠意庶幾太上之歡心可得矣三年以起居舍人假工部尙書使金初涇之往寧宗諭使覘釁涇懼輕動還奏一敵滅一敵生無以金之危亡爲喜除直煥章閣知慶元府沿海制置使以言者論罷是時權姦用事涇斥去十年不調於里中闢西園名其堂曰後樂開禧元年得旨入朝明年除中書舍人兼直學士院論北伐非計不聽三年自吏部尙書拜御史中丞請誅韓侂胄論罷右丞相陳自強拜參知政事封崑山縣開國伯嘉定初兼太子賓客始侂胄誅涇之功居多繼又患史

彌遠有專恣之漸欲去之彌遠爲景獻舊學知涇謀風御史劾罷之五年知潭州八年知隆興府上以涇三世同居有堂曰友順御書二大字太子亦爲書後樂堂勝賜之九年知揚州十七年除資政殿學士金紫光祿大夫致仕進封吳郡開國伯寶慶二年卒理宗輟視朝一日特贈太師追封秦國公賜諡文節涇歷仕三朝出入內外四十餘年憂國忘家始終一節而謀深慮遠不徼近功其進退之際不與時升降在朝孤立自守不畏彊禦薦進搜舉汲汲如不及在潭時與朱熹交好侂冑指熹爲僞學斥之侂冑旣死涇奏召熹還朝而熹已卒復

移文新安取熹諸經四書傳注刊刻以傳又請爲右文殿修撰張栻賜諡所著文五十卷曰後樂集弟湜字正叔好古博學除太府寺丞將作少監皆不赴嘗集禮記諸家傳注爲一百六十卷名曰禮記集說寶慶三年上之終朝散大夫直寶謨閣知袁州學者稱爲櫟齋先生

顧志名臣 雲間舊志 衛文節公生於蕭塘今爲崇福寺又崇福寺記云涇以故第益之然則徙於崑山僅同寄籍而涇之生長固在華亭矣

胡林卿淳熙十四年甲科與史彌遠同榜史後柄國勢燄熏灼終身不登其門及卒有輓之者云有名登相榜無迹到權門初縣未有志林卿始與知縣楊潛同邑林至

朱端常同修爲三卷號雲閒志時紹熙癸丑也蒐錄事實能舉其要後郡邑志皆原於此先河之功自不可沒除迪功郎饒州州學教授子琚嘉定十三年進士學識該博能詩有靜庵集行世

郭志文苑

田疇號與齋嘗爲史彌遠客列翹材館中彌遠爲設講席於國學六館之士北面焉不仕有學易蹊徑四書說約行於世

郭志文苑

林至字德久淳熙十六年釋褐歷官祕書省登晦庵先生之門有釋騷及文集行世子革世其學登嘉定十三年

進士

郭志文苑

松江府志

卷五十一

古今人傳二

三

景時字秀發慶元三年知龍泉縣之官日水患甫寧時撫字催科不爲刻礪修學校建譙樓縣倉嘗曰吾於龍泉政事無以踰人惟不擾二字始終守之

吉安志

許尙不知其字號和光老人能詩文有廣化教院記及華

亭百詠詩

顧志文苑

高子鳳字儀甫以詩名嘗注杜詩林竹溪爲作序有文集

若干卷

郭志文苑

朱允恭字爾靖號樗齋與族人藤州守日新號足庵者竝以詩名四靈趙天樂選允恭詩二百餘首爲集

郭志文苑

儲泳字文卿號華谷居杜浦以詩見稱雜著甚多有祛疑

說行於世弟濂字智卿號晴谷亦有詩名

郭志文苑

衛宗武字淇父以父蔭官州守文及翁序其詩文名秋聲

集

郭志文苑

葉汝舟字濟川登開慶元年進士有刊行通鑑筆義所著

詩文藏於家

郭志文苑

朱樸隱居華亭自號天和子黃裳徐鐸楊傑趙挺之豐稷

竝有天和堂詩

雲間志

王奎其先大名人裔出文正公且祖逖太常少卿靖康中

避難自金陵再遷華亭奎風容韻亮好為神仙方術自

號蟾谷真士嘗著蟾谷祛疑貫靈篇行於世嘉定寶慶

松江府志

卷五十

古今人傳二

三

閒再徵不起卒之先一月徧告所知曰吾將頤化矣至

期沐浴冠裳而卒

趙松雪集

鮑廉其先浙人咸淳中知臨江軍德祐元年二月元兵渡

江廉率所部迎敵於天長六合閒大小百餘戰既而元

兵合圍退入臨江城陷向闕泣拜遂殉節子穆景定閒

中宏詞科宋亡隱居不仕

南匯志

謝國光字觀夫號節齋晉太傅安二十六世孫六世祖某

隱居華亭南之立極遂為邑人宋咸淳九年領鄉薦明

年上春官以所對策剴切主司畏賈似道不敢取例補

太學生宋亡遂不仕元治書侍御史程鉅夫奉詔搜賢

或以國光薦輒杜門稱疾以經史自娛至正乙酉卒遺命題其墓曰安節表其志云孫晉字彥明善醫有文行

顧志節義

曹澤之字仲溥號守齋其先溫州人占籍華亭家小蒸澤之在宋以長秋恩補秉義郎入元授常州路儒學教授不赴生平孝友讜直篤於族里當宋元兵燹閒賴以保全者甚衆所居有堂曰樂靜故學者稱為樂靜先生卒年八十三子應符自有傳

青浦志

曹應符字泰叔號梅渚謹身飭行為鄉里推重咸淳初兩領鄉薦十年登進士第授迪功郎衢州司戶參軍會宋

松江府志

卷五十

古今人傳二

三

亡遂隱不仕族人光遠號東洲咸淳五年進士辟監華豐莊改軍器監簿宋亡衣冠不改人稱大頭巾相公云

顧志節義

黃裳字齊賢家世儒科為浦城望族父游學始居雲閒裳少孤自立操履醇正兩與鄉薦以特科授初品官調邵

武尉歷天台丞

古刻叢鈔

陸霆龍字伯靈咸淳鄉貢進士禮記都魁宋亡即棲隱講授終其身衣冠不易自贊畫像云勤勤劬劬耽嗜慕悅而不忍舍者聖賢之書越越起起畏懼退縮而不敢登者世利之途暈輕霞以為臉縷積雪以成軀衣前後而

襜如儼張拱而徐趨或者見之而指笑此必抱遺經行  
古道之拘儒顧志節義

殷澄字公源居胥浦在宋避諱爲戴氏父某宋節幹官家  
富好施人目爲殷佛子澄性介特平生無宿諾見義必  
爲避地南錢元兵入華亭南錢猶保聚不下將軍號楊  
埽地者怒欲屠之澄奮曰我可無一言而死乎遂叩軍  
門大言曰夫民猶水也水順則流逆則激民順則寧逆  
則亂今郡縣新附將軍不撫綏招來以稱示神武不殺  
之意顧欲盡勦斯民乎楊怒手劔叱之澄正色曰殺我  
一人活千萬人死猶生也語益烈楊感悟而止全活者

松江府志

卷五十

古今人傳二

三

以萬計丞相伯顏聞而義之授華亭軍民都總管使守  
其地澄不受曰大宋亡我以親在不死顧獨不能逸乎  
遂野服隱居浦上時游峯泖閒人目爲泖南浪翁郭志獨行

李智遠自號谷隱野人居頤浩寺竟日掩關澄心默坐若  
槁木然元兵至不去兵擒之不驚及縱之亦不喜事定  
月餘忽沐浴衣冠危坐手書一絕云四十三年處世中  
夢中成夢又成空今朝撒手還歸去木馬頻嘶物外風

書畢而逝

郭志  
隱逸

莊肅字恭叔號蓼塘居青龍鎮仕宋爲祕書小史宋亡棄  
官浪迹海上性嗜書聚至八萬卷手鈔經史子集下至

稗官小說靡所不具書目以甲乙分十門至正閒修宋  
遼金三史詔求遺書危素購於其家得五百卷所著有  
藝經畫繼餘譜傳於時顧志文學上海志

黃庚太學生能文章尤工畫宋亡不仕著樵吟集上海志

呂德謙文穆公後世居胥浦有隱德子允恭字萊翁自宋

入元高節不仕金山志

任良能字子益號清逸處士讀書樂道力行孝弟能詩文

省府交辟不起上海志

衛謙字有山一字山甫號山齋六世祖仲達尚書父宗武

知常州竝有傳謙風神都雅進止可觀初登進士第調

松江府志

卷五十

古今人傳二

三

丞永嘉未行元師及境樞密董公與語奇之版授漳州

龍溪尹辭不就鹽丁楊姓者以妖煽眾掠海上分守千

戶沙全疑邑民反側將并殲之謙亟詣全開譬以身保

無虞事遂寢陞溫州路治中復辭乃立義莊贍宗族及

鄉閭之貧者建義塾教願學而無師者同邑錢參政孫

女賣謙家為婢已劑而知之命家姬教養三年治匱具

擇世族子嫁之其為義多類此翰林鄧義之趙松雪郡

守張西巖皆與為文字交名人韻士游其門者無虛日

遠近識不識皆稱為衛山齋所著有讀易管見三十卷

子德嘉字立禮閉戶讀書辟舉皆不就妻亡不再娶獨



居凡三十年至正間盜起州里解散德嘉不爲動曰吾當守死先祠下耳時人稱其孝子剛能詩有江水深深碧梨花淡淡明之句楊鐵崖亟稱之

顧志節義

衛富益華亭人自號畊讀居士文節公涇裔孫宋亡日夜悲泣設壇祭文天祥陸秀夫張世傑辭極哀慘嘗從金履祥許謙受學謙以齒齊名重不敢當北面禮許卒爲制服自以宋世遺民絕意仕進隱居教授究心性命之學創白社書院春秋社日與布衣友賦詩講道搢紳不得一與後攜仲子隱湖之金盞山著四書攷證性理集義易經集說讀史纂要耕讀怡情等錄至治間以長子

迎養還故里不談世務不履城市或有乞詩文者辭之一日邁微疾悉焚所著書集曰吾志晦迹安用名世況元妙處宋儒究盡吾錄糟粕何益於後卒年九十六門人私謚曰正節先生

陳志隱逸

俞道善其先吳興人汝尚退翁之後宋季兵起移家避亂至華亭愛其土俗淳厚尤喜九峯娟秀卜居鳳凰山之南歎曰宋社已傾我輩但期力耕耳因戒子孫勿干仕進嘗作漢瓦硯銘以寄宋室之思焉四世孫顯字彥遠元末盜起奉其母以逃路阻大澤盜且至顯度不免默禱天負母竟涉如行淺水盜異之不敢迫遂免於難賦

性愿直寡言笑雖造次必循矩度立義塾教授里中鄰子弟不循檢者相戒懼其聞知治家尤嚴晚年卜居祥

澤里人稱澤隱處士

郭志  
獨行

松江漁翁不知其姓名每櫂小舟游長橋往來波上叩舷飲酒酣歌自得紹聖中閩人潘裕自京師調官回過松江遇而異焉起揖之曰予視先生氣貌固非漁釣之流願丐緒言以發蒙陋翁瞪視曰君不凡若誠有意能過小舟語乎裕欣然過之翁曰吾厭喧煩處閒曠遜迹於此三十年矣幼喜誦經史百家之言後觀釋氏書今皆棄去惟飽食以嬉尚何所事裕曰先生澡身浴德如此

松江府志

卷五十

古今人傳二

三

今聖明在上盍出而仕乎笑曰君子之道或出或處吾雖不能棲隱巖穴追園綺之蹤竊慕老氏曲全之義且養志者忘形養形者忘利致道者忘心心形俱忘其視軒冕如糞土耳與子出處異趣子勉之裕曰裕也不才幸聞先生之高義敢問舍所在曰吾姓名且不欲人知況居室邪飲畢使裕反其所鼓枻而去

宋史

元

費棻字子壽湖州長興人徙嘉興再遷上海宋末以策干兩淮制置使補進勇副尉轉武節郎泰州指使慶元路巡檢歷遷本路鈐轄權提舉上海市舶元初授武德將軍

軍金牌千戶措置上海市舶居二十年遷宣武將軍管軍總管兼鎮守上海總管府事沿海民船無所統或流入盜賊案請錄爲戶蠲其徭役而官領之可得海船數千稍水數萬備國用乃賜虎符授明威將軍管領海船萬戶任其事踰年丐閒遷懷遠大將軍遙授浙東宣慰使卒贈護軍鎮國上將軍江夏郡公福建宣慰使都元帥諡榮敏察器局寬整侗儻而篤厚賓禮名士尤輕財樂施人呼爲費佛子稅司重估苛取市區晝閉察請依額抱辦且用三十稅一之法不足則補以私錢戊子水後官計口賦鹽期限星火察曰饘粥不給何有於鹽先

以鈔輸官徐取鹽付列肆願買者聽勿彊酒課不均民破產案請以田業爲斷貧下戶悉除之鄰境牒惡民相讎殺將獮薙之案建請招收從征日本使自贖數千人得不死卒之日鄉人皆罷市往哭至相與爲佛事以報之陶宗儀輟耕錄載其家斛銘曰出以是入以是子子孫孫永如是其爲人可知子拱辰武德將軍平江等處運糧萬戶上海初建學拱辰實爲之經理云

顧志名臣

瞿霆發字聲父其先汴人扈宋南渡居上海父君用承信郎霆發幼穎悟書一覽輒成誦才氣落落不羣元兵次臨安遊騎及境霆發年二十六挺身兵閒率衆歸附一

境賴以全命爲下沙鹽場副使擢進義校尉同提舉上海市舶秩滿召見授承務郎兩浙運司副使海潮壞鹽場死者萬計寔發傾力救之流亡復還鹽事以集仁宗時居潛召對稱旨請以爲集賢學士避不敢當陞中順大夫遙授兩浙都轉運鹽使以捕蝗功改少中大夫真拜運使浙東饑亭民死徙寔發稽戶數第物力而均之課更以最事聞召見使未至而卒寔發事母孝得時物必先供乃敢嘗喜賓客樂施予西湖書院上海縣學咸割田以資之鄉鄰貸貫未嘗筆記也嘗有貧士僞作運使張文質書來謁寔發得書命門幹贈以楮三定幹鄙

松江府志

卷五十

古今人傳二

天

其人未與寔發知之亟取五定加以溫言而遣之幹白其故寔發曰汝何知彼何不作書於汝邪時人服其量

顧志名臣

任仁發字子明上海人世居青龍年十八舉鄉貢元兵南下平章游公見而器之署宣慰掾以招安水島引爲青龍水陸巡警官討盤龍寺叛僧有功會征交趾改海船上千戶轉漕直沽以治水擢貳都水監府境開江置牖皆仁發議之大都通惠河楊隱牖奔覆會通河淺澀汴梁黃河浸歸德府杭之鹽官海塘崩陷仁發皆嘗治之及疏導吳松大盈烏泥等河具有績效任守宰民多立

祠祀之後以中憲大夫浙東道宣慰副使致仕卒年七十三著有水利書十卷工詩善畫有熙春天馬二圖藏祕監子三賢材考城令賢能涇令賢佐台州判官顧志名臣王泰來字復元奎孫性剛狷不爲柔諧與人交稍或乖義無貴賤親疏輒面責不少假借少習舉子業由鄉貢入太學棄去放浪江湖閒所至人邀致之江西帥盧鉞事泰來以師禮未幾復棄去至元中再徵不起二十三年侍御史程鉅夫奉旨專召二人其一泰來也見上歡甚館集賢時召入論事持正不回每深語薄夜半命中使及衛士炳炬導歸以爲常同召者葉李拜尙書左丞將

松江府志

卷五十

古今人傳二

三五

授泰來官忽與葉語一不愜卽拂袖起曰無辱我乞歸得請泰來早以詩鳴寶祐開慶閒有集行於時晚年裒益總若干卷其游情物表發興天倪蓋世所不能羈者精數術一日索紙書偈曰眼耳鼻舌俱是病根無出入與天常存書畢輪左手指曰時可矣語絕而逝卒年七十三子謙字一初能世其學占事知來若合符契游京師得官大被親遇至正閒乞歸出爲鎮江路總管尋授嘉議大夫寶慶路總管致仕顧志名臣

陸鵬南號象翁華亭人明毛詩不仕文章奧健與陸靈伯齊名鄉里稱爲二陸著有九峯清氣集顧志文學

唐時措上海人家饒於貲慕義好學能古文咸淳閒上海  
爲巨鎮俗近商賈學校未興時措與弟時拱市韓氏屋  
請於市舶提舉董楷作古修堂以祀先師集諸生爲肄  
習之所至元二十八年始縣上海卽授時措爲學官

上海

縣志

黃允恭字敬翁華亭人居長泖之灣江南新附愚民相率  
爲盜家遭焚掠恭刻苦復先業篤於信義能緩急人性  
至孝母吳氏垂百歲恭年踰七十溫清定省未嘗廢以  
孝義旌於朝年八十七卒子鉞字宗武隱居不仕築樂  
全堂學士虞集記之世稱樂全先生孫璋兩舉鄉薦用

松江府志

卷五十

古今人傳二

三

特恩補官

金山志

湯文英字孟寬華亭人世篤孝友至文英八世同居至元

閒表閭復其家

顧志  
孝友

潘世英字積中華亭人至元閒用御史薦隨牒至閩南會  
汀寇林頑斷官道蹂躪鹽場煽毒齊民世英悉釋其誑誤  
復業者一千三十戶興化賊起帥府分遣本道督捕選  
世英從官軍有戮平民冒功者世英曰民苦脅從非本  
心也請帥抵賊壘反覆慰喻皆感泣縛其渠魁以降復  
業者一千五百戶初江淮賊起分兵守關世英實董之  
左丞老老鎮江東遣使起關上兵使者露刃以脅之世

英曰我受兵守關兵一轉足則閩危矣使者厲聲曰汝不畏死邪世英張髯引頸曰頭可與兵不可與使者還自左丞歎異久之已而餘寇復至同安募義兵航海忽安溪賊掠縣境入縣廨世英坐不起罵賊不絕口遇害歸葬於干山通志

蔡廷秀字君美華亭人由郡諸生試吏調江陰累陞浙省理問所知事袁州推官用中書左丞薦擢江西省檢校命下已遇害初袁州守將計殺土豪其餘黨匿山谷者導寇陷袁廷秀被執三日罵不絕口死平生博學器識

沈毅宿儒先德竝友重焉陳志 賢達

松江府志

卷五十

古今人傳二

三

羅璧字仲玉鎮江人也至元初授管軍總管鎮上海因家華亭累功拜鎮國上將軍廣東道宣慰使都元帥換正奉大夫都水監終於官贈護軍諡桓敏初朝廷議轉江南粟以實京師璧獨以海運便漕舟率先道海自楊村入不數日至京師子坤載蔭知餘姚縣歷泗州有惠

政嘗著厚俗篇顧志 名臣

祝岫字秀巖華亭人以字行居西郊今其里猶名祝家帶大德閒為海道都漕運萬戶府經歷陞平江路總管岫為人英拔豪闊篇翰清美所交皆一時名俊與趙孟頫朱德潤尤氣誼相許卒於官子孫家吳門顧志 名臣

凌巖字山英號石泉華亭人少習舉業宋亡撫時感事一

寓於詩鎔意鑄辭鏘鳴秀拔時流盛推許之有古木風

瓢集行世郡中九峯次第題詠昔人稱為山史

郭志文苑

曹知白號雲西其先永嘉大族宋宣和中景修始遷華亭

長谷之西地號貞溪知白身長七尺美鬚髯性機敏至

元三十一年詔遣中書左丞鑿吳松江以策從行功最

多大德四年庸田使柳公行水復獻填淤成隄之法民

甚德之丁母艱哀毀盡禮服除大府薦為崑山教諭不

樂辭去嘗游京師王侯鉅公多折節與交章辟屢上知

白悉辭謝曰吾聞冀北多奇士庶幾見之豈齷齪求官

松江府志

卷五十

古今人傳二

三

者邪即日南歸隱居讀易終日不出戶庭或放筆圖畫

掀髯長嘯人莫窺其際周卹姻黨惟恐後篤於交誼若

文士許應元李冲劉世賢詩僧崇古生則延館死則為

治喪葬人稱為貞素先生

郭志隱逸

邵天驥字千里其先洛人康節先生十世孫也高祖宗穆

始家華亭胥浦鄉天驥在宋嘗以易經中選入元不仕

以濟人利物為心闢義塾教鄉之子弟割田資之大德

閒西湖書院毀天驥與子彌遠鼎新之彌遠常慕漢東

平王唐張公藝之為人取經傳言為百善百忍圖

郭志獨行

陸厚華亭人居城東自號東園散人長身虬髯博洽經史



尤喜陰符韜略諸書知兵法方兵變時將帥聞其名欲致之覓不可得往來若雪閒兵息歸里嘗遇異人得子午按摩法療病不施鍼炳對坐笑談頃卽脫去未嘗受人直或勸之仕不應有詩集名古漁唱

顧志隱逸參浙江通志

杜元芳上海人性醇厚官德清主簿晚隱杜村構翡翠碧雲樓貯書萬卷又置別業於杜浦杜浦者周浦也村與浦皆以杜氏所居名從子希伯字正甫有潛德

南匯志

孫稷字長慶華亭人言行修謹雅有高節嘗舉文學官不就卜居橫雲山麓讀書賣藥超然物外名其居曰小山

招隱江陰王逢爲之辭

顧志隱逸

### 松江府志

#### 卷五十

古今人傳二

三

夏侯尚元字文卿華亭人幼有大志好學深思下筆數千言立就時人稱爲小太白大德閒游京師趙孟頫薦之爲東宮伴讀旋辭去汗漫湖海者數載後游漠北諸王閒爲武平王所禮武平王薨郊王聞其賢招致之待以上賓王好尚書性嚴毅寡言笑人莫敢犯文卿感禮遇知無不言氈廬抵掌或以爾汝呼王王知其忠直優容之會王以召命赴京文卿曰王守國北門不可輕動或陷虎口悔將何及王不聽文卿乃馳驛還南及至都王已被誣沒親信莫不逃匿獨文卿詣朝陳王忠孝每語聲淚俱墮衆爲感愴書三上詔雪王冤以子襲爵或曰

公節義昭著朝野皆知王子孫必有以報公文卿曰王被禍而已微功吾滋戚遂辭歸不復仕著有中庸管見

聚疑原孟諸書通志參修 顧志節義

夏椿字壽之其先長興人兄杞宋景定閒為華亭典押因占籍華亭椿早孤事兄如父喪葬盡禮至元丁亥歲饑椿出粟賤價以糶庚寅海濱饑賤糶猶不給設粥僧寺以待餓者大德丁未旱災鄰境攜持老幼歸之椿闢廬舍具饘藥視其羸壯而食飲之欲去則贈以資死者給棺以瘞事聞旌其門為義士自郡城距海百里凡橋梁衢巷慈幼之局養老所廬椿悉為繕治每朔望飯囚徒死

松江府志 卷五十 古今人傳二 三

者與之棺卽其居創義塾以訓鄉之子弟割上田五百畝以資之御史景遠為作義士碑卒葬細林山鄧文原

志其墓顧志節義參 郭志獨行

何敬德字孤巖上海人家申浦之東性淳樸善治生為吳郡張瑄行船筦庫數年贏百千萬一錢不以自私瑄父子方倚之敬德辭去瑄貴盛向時主計客皆佩虎符為萬戶千戶敬德方布衣蔬食遠迹自疏勸瑄父子毋嗜進厚藏速禍瑄敗盡收其黨與敬德獨不與人服其有識大德十一年杭大饑當事煮粥仙林寺中民爭食踣藉死者甚眾敬德請於杭好善有材智者數人卽菩提

寺乘夜煮粥置大甕中明旦飢民至先後列坐相向虛其前以行粥食已以次去日煮米七八石至十石六月至八月凡七十日明年春敬德復集諸好善者收聚道路骼齒數十萬具瘞之夏爲粥如初始五月朔踰三十日而敬德沒年五十七後十八日所貯錢米亦盡道路號泣曰何不延何長者至中壽今窮人無所賴矣胡長孺曰往歲湖州作糜飢民糜出釜猶沸器中人急得糜食已輒死百步閒長者夜作粥貯大甕中蓋懲湖州事也有意哉

顧志節義

任仲孚上海人好義樂善大德閒饑發米二千斛穀八百

松江府志

卷五十

古今人傳二

三五

斛以濟貧乏部使者上其事詔旌其門擢其子良佐溧

陽縣儒學教諭良輔信州疊山書院山長

顧志節義

陸居仁字宅之華亭人霆龍子以詩經中泰定三年鄉試

工詩古文精書法號巢松翁晚號雲松野衲瑁湖居士

與楊維禎錢惟善友善沒同葬干山稱三高士墓

顧志文學

姚玉用華亭人循理樂善至治閒割田立義莊歲收租千

餘石以周宗族鄉黨建義塾於家以教鄉之子弟知府

申秉禮聞其義委葺西湖書院遷義塾其中以便學者

四方士子聞風而至者千二百人府嘗修儒學玉用功

居多從父俊讀書好禮有孝行從弟實夫克協兄志營

廉宇復譙樓率先助費孝義聚於一門鄉人稱之顧志節義

陳明字彥古上海人湖廣等處泉貨少監勇之子仕至中

議大夫同知贛州路總管府事請老授嘉議大夫揚州

路總管致仕卒贈嘉興路總管賜爵潁川郡侯顧志名臣

王德章其先金陵人占籍華亭任崇德州都目公正廉明

邑人三為立碑以頌孫濬明永樂中任禮部主事嘗使

至太倉封西洋寶船裁抑冗費民以不擾陞郎中顧志名臣

殷輅字乘之華亭人初為上海掾史後官鹽司橫浦調嘉

興有僧告其族賊殺事久不決移輅讞即得賊而冤繫

者二十人悉脫之甲訴乙溺其子於水縣讞不自輅鞫

松江府志

卷五十

古今人傳二

三

之乃他姓疾子為盜私捶殺而誣乙也良民有與盜首

疑名者吏脫正犯而收之輅白長令即日釋去後以行

中書選擢知縉雲縣縣豪號兩虎者閉戶斂迹終輅三

年不敢肆有富民坐令門豎捶殺平民獄辭多連吏欲

出甲繫乙且以脫富民輅問故曰甲多子女繫之必有

辭乙鰥獨不慮也輅曰人苟畏勢利殺無罪者尚謂有

天道乎遂正其法浙江通志

王昭大字茂卿華亭人博綜經傳於易尤精年耄始調湖

州路學教授不以晚仕槩懷繼署桐鄉邑丞致仕至正

閒年踰大耋時詔例賜致仕官金文采幣昭大美髯修

幹被服恩榮優游里陌咸尊禮之

陳志文

詹潤華亭人以父號梅懼因號肖梅少有俊氣及壯以文  
儒為諸暨州學正秩滿例試教授潤太息曰以我之才

試教授邪即襍被歸

顧志文學

徐順孫字子靜華亭人父號菊存因自號敬菊淹通經術  
賦性純孝痛父母早亡已獨不娶以終其身嘗讀秦紀  
賦詩云大藥若從三島至蒼生能有幾家存時傳誦之

顧志文學

曾遇字心傳華亭人裔出宋丞相亮後博學敏文辭尤工  
筆札以薦授湖州路安吉縣丞致仕與王昭大詹潤徐

松江府志

卷五十

古今人傳二

三

順孫同游時號雲閒四俊

顧志文學

曹慶孫字繼善華亭人居貞溪本處州教授邵桂子之子  
邵娶曹澤之孫女以慶孫繼舅氏後故又名絮云延祐  
四年薦充平江路吳縣學教諭徙淳安未幾告歸不復  
求仕進杜門力學必得古人之意而止為文平易條暢  
以理為主能盡其所欲言詩清潤古淡根柢於陶孟韋  
柳自成一家同時虞集柯九思楊仲宏輩皆與為文字  
交嘗買地崑山之陰構室以祀陸機兄弟行省聞而嘉  
之至正二十一年無疾而逝年七十八著有副墨集東  
山高蹈集灑東漫稿慶孫所居堂曰安雅人因稱安雅

先生

顧志文學  
參青浦志

沈雍華亭人父騰字茂實著有雙清詠史稿雍與弟穆竝以孝友稱至正丁未夏四月三日吳松兵變禍延城邑騰挈妻孥走避雍兄弟守家廟不去悍卒排闥入卒發二矢雍中左髀穆中臂僵戶外卒復引刃擊雍項背穆以身障雍跪訴曰吾兄儒者為鄉社師不可殺某不才請代兄死兄亦訴曰吾弟力田養親不可殺寧殺吾卒感其義竝舍之楊維禎有傳

郭志  
獨行

錢璧字伯全華亭人品行端慤其學尤邃於書登至順三年鄉榜陶宗儀早歲嘗從受業云

郭志  
文苑

松江府志

卷五十

古今人傳二

三

金子安字幼仁上海人居漢成里七歲失怙事母凌得其歡心母嘗遭疾子安稽顙北辰求以身代母危困中忽蘇曰適神語吾加爾壽三十四後母沒乃三十四月也居喪毀瘁哀痛終其身鄉鄰有悖倫者往往感激改行嘗市地於鄰除之得白金一罌亟召其人歸之時又多其義

郭志  
獨行

章夢賢字思齊上海人居青龍鎮宋秦國莊敏公燾之後孝友通練喜賓客好施惠元至順初嘗出粟二千餘石賑鄉里辭不受官詔旌為義士之門與同郡管仲德等俱以散財周急聞後至元中薦授襄陽等處營田提舉

建康等處財賦提舉以父母早亡伯兄又多疾卽棄官歸終身不仕事其兄如父置義莊以贍宗族建義塾以教鄉黨子弟兄沒撫其孤如子闔門二百餘口未嘗有閒言子元澤初爲丞相府舍人累官奉政大夫江浙財賦副總管以母老棄官歸養楊維禎亟稱之後以朝列大夫彰德路總管府同知致仕

顧志孝友

唐昱字仲明世居華亭徙上海至順庚午郡大水捐粟五千斛上之官以賑境內其私賑益無算事聞授浙西袁部場司丞秩滿轉江西蘆潭批驗所提領以廉幹謹慎稱年七十乞休賜七品秩授徽杭等處權茶副提舉自

松江府志

卷五十

古今人傳二

三

庚午後歲屢歉發私財煮糜濟飢至老彌篤壽九十卒生四子九孫五世同居內外輯睦昱業不踰中人而能好施遠近皆賢之

郭志獨行

徐初字本道華亭人居青村早喪母父嬖後妻惑其譖初事之益恭父暑月病疽穢惡流衽席初身自澣滌不解帶者經月父感悟喟然曰汝真吾子也異母弟亨無術業初甚愛之至正丙申浙右警初練鄉里子弟數千備禦或誣其有異志縛送柳上軍初至軍門呼曰吾欲反卽蹈海去耳寧猶戴吾頭爲將軍得乎且將軍欲有所舉事宜分別良莠以順人心天下寧有白頭作賊也帥

壯其言釋之且薦以官不就顧志孝友

徐誠字信之上海人元至正閒父為金玉局大使嘗遇疾

醫禱皆弗應因割股和藥以進疾尋愈家素封自奉甚

穀獨好施予三族多待以舉火庚午辛未歲大祲為饑

粥以食餓者活萬餘人顧志孝友

趙恭字思恭上海人家貧好學涉獵經史性至孝母方氏

臥疾久不愈恭憂悴不知所為乃齧臂肉作羹啖之疾

尋愈父通患蠱疾其弟敬割股肉為糜以進亦愈時竝

稱之顧志孝友

王太初字古心通易有貴土集漁樵稿筆錄行世上海志

松江府志 卷五十 古今人傳二 罕

陸侗字養正詩典贍雄偉其題詠景物尤善鉤想往往出

人意表同時若王泳趙鎮殷汝舟姚玘俱能詩文汝舟

尤長於經學郭志文苑

姚玘字比玉華亭人居金澤家甚貧喜讀書里中大姓林

氏為延名師盡出藏書教之卒成業楊完者兵亂玘奉

母陳氏逃至河不得渡母曰兵至吾誓不受辱遂沈水

玘倉皇投水救之負母而出玘嘗中流矢伴死伏尸閒

得逸去奉母過河母命潛往某處取所藏金又為張士

誠兵所虜疑從苗中來縛送泐上軍會有辨得免主軍

者因署為部吏玘朝夕憂以母病革報泣訴得暫假以



小舟載母遁母病思魚羹暮夜莫能得家蓄烏圓甚馴  
囑之若有會尋出戶致白魚盈尺以歸供母人以爲孝

感兵息浙行省辟之以親老辭人益高其節云

郭志獨行

王文澤字伯雨華亭人家風涇後遷上海祖大言父京竝

有名譽文澤學問尤邃詩文高古累舉不第爲府學訓  
導卒所著有尚書制度圖纂三卷自立齋詩文十卷子

默自有傳

陳志文學

任暉字東白華亭人祖仁發歷官都水監父賢材繇祕書

監遷考城令暉喜文史善賦詩脫去凡近與楊維禎游

嘗邀至其家校讎商榷維禎極愛重之有東白集

郭志文苑

松江府志

卷五十

古今人傳二

聖

呂良佐字輔之華亭人居璜溪好學有才氣與楊維禎陸

居仁諸公游嘗爲應奎文會遠近聞其名投卷者甚衆

至正兵起總帥與語大悅版授華亭尹辭請以白衣議

事帥賢之俾自集白甲保障鄉里全活者數千家

郭志文苑

王默字子章一字伯靜上海人文澤子身長八尺美鬚髯

談吐高亮少任俠多技藝弱冠更折節讀書書法趙孟

頰行筆甚捷徵至京書金字浮屠經擬官翰林見時運

已否力辭歸名聲大振求書者填戶父沒盡鬻書買山

以葬廬墓下者久之雅好泉石遇勝處輒忘返尤喜爲

人排難解紛奮不顧利害張句曲稱其豪宕不羈有姜

白石風子基洪武初舉孝廉爲潞州判官嘗著雪齋明鑿錄秦裕伯亟稱之

顧志  
藝術

彭汝器字宗璉上海人博學有史才嘗評宋史謂杜后遺命立太宗與宋宣公舍其子而立穆公同爲貽亂於後太宗問傳代之事趙普知爲太宗謀而不爲太祖謀欺天之罪不可追神宗將崩宣仁豫製小黃袍以備倉卒立哲宗宋賢后當以宣仁爲冠貝瓊爲撰筆諫軒記深許其識古今得失大義云

郭志  
文苑

余瑾華亭人居籛山因自號筇隱生幼時嘗夢掘地得大小墨數百笏遂善屬文長好游名山至正閒自具區道

松江府志

卷五十

古今人傳二

聖

毘陵渡江抵淮泗以直言于在位者弗用歸山中著史補斷丹崖夜嘯金聲錄玉露吟若干卷或勸之仕則曰大丈夫仕當爲天下除殘剗暴否則不如抱膝坐耳遂終其身

顧志隱逸參  
揚鐵厓集

陸德芳字顯叔華亭人至正壬午舉人授般陽路學正未幾挂冠歸時元平章河南沈照避地海鹽之甘泉鄉德芳傭書其家俄與談經史論時事沈大驚詢知所自遂以女妻之明初以逋臣薦不赴

樵李  
詩繫

杜英發字俊卿上海人祁國公衍九世孫仕爲建寧學正陞教授歸隱西霞浦上號西霞道人初季父某無後嘗

養莫氏子爲其幼復以英發爲後及季父沒悉以產歸莫氏子復爲之冠娶待之不異同氣族困於徭役首倡置義田儲粟若干石以資之鄰里婚喪皆有給其勇於義如此然貲產不逾中人云

顧志孝友

陳良用字子忠宋太傅堯咨十一世孫至元丙午值歲大稔良用輸粟千石以賑飢事聞詔授冠帶洪武庚戌卒年八十七

奉賢志

馮濬字淵如華亭人詩載玉山集昔人評其清俊

錢應庚字南金華亭人贅居柳上與邵亨貞同里開以文字交其後門人曹幼文闢室館之名曰一枝安

松江府志

卷五十

古今人傳二

聖

俞庸字子中其先嘉興人占籍上海仕爲推官詩載大雅

集子俊字子俊號雲巢麗水巡檢改平江判

櫛李詩繫

衛仁近字叔剛華亭人德嘉之子也嘗以詩質楊維禎維

禎稱其奇節興象可追盛唐有敬聚齋詩稿世最稱其

秋夜曲白苧詞九山讌集等篇

郭志文苑

唐華字明遠華亭人隱居小蒸累薦不仕善鑒鼎彝圖書

失物不校人服其雅量

田茂遇水西高逸詩

姚汝嘉號愚默華亭人學行樸實爲鄉里師年八十餘猶

讀書不倦與天台楊仁壽冀北李璋無錫華文瑾結社

卒竝葬陶溪之純陽庵時稱陶溪四隱

陳志游寓

周之翰字申甫華亭人幼穎悟博究羣書尤通象數之學其著述有乾坤闔闢天地生成陰陽變化山川流峙四圖并贊以發明其蘊奧講授於鄉以壽終通志

沈鉉字文舉華亭人隱居泖濱築室曰野亭楊維禎為之

記倪瓚高啓皆有詩子復吉通儒書精醫術游於中都

作植芳堂天台王璞四明鄭真記之青浦詩傳

楊謙華亭人別號竹西世居赤松溪上好讀書不樂仕進

海內高人逸士多與之交嘗築小樓登眺海中大小金

山題曰不礙雲山樓楊維禎貝瓊俱為之歌詠郭志隱逸

孫道明字明叔華亭人居泗涇博學好古藏書萬卷遇祕

松江府志

卷五十

古今人傳二

四

本輒手自鈔錄嘗築映雪齋延接四方名士校閱藏書

為樂又造一舟曰水光山色徜徉南浦自號停雲子嘗

與陶宗儀共汎宗儀製詞道明即譜入調中倚洞簫吹

之與權歌相答極鷗波縹渺之思宗儀有記陳志隱逸

陸泳字伯翔華亭人隱居大蒸盡心農事采方言習俗作

田家五行以占豐歉楊維禎陸居仁敘而傳之顧志隱逸

王泳字季瀾上海人衡山主簿鏞之子也鏞卒遺命以庶

弟奉其生母泳悉推舊田宅與之所居貧薄躬執家事

晏如也自號靜習或問靜何習輒對曰習不繇靜未嘗

學也門生輩為買龍華之原營壽藏泳角巾藜杖逍遙

作歌歌闕長嘯而返梧溪王逢爲銘其藏陳志隱逸

楊德懋華亭人善書法通左氏春秋尤究心太極圖通書

買田澱山之西躬耕不仕明初徵天下真才郡縣薦之

命下辭曰唐堯聽巢父之洗漢光遂子陵之高富貴非

吾願也卽自眇其左目以示廢疾不可用優游湖上卒

年九十二里人稱之爲自廢公云郭志隱逸

唐時字耕隱華亭人父崙以高節著時年三十始娶夏椿

延爲館師供饌豐厚時曰吾素性淡泊不欲以肥甘損

福也夏重之鄰有孀婦餽以餅餌正色拒之夏聞之益

加敬焉張氏據吳杜門不出陶宗儀爲作義士傳陳志篤行

松江府志 卷五十一 古今人傳二 聖

葉以清字子澂其先京口人祖懋宋末避地家華亭以清

尚氣節有古俠烈風德清尉劉景告以三喪不舉卽貸

五十緡監黟縣伯顏疾作屬妻子曰我死母老當往依

華亭葉子澂顏果死以清夢顏至曰以入口累君越二

日其妻子果奉母至爲收卹之苗兵據松江張士誠逐

之其僞尹鄭煥欲蕪巨室黨苗者以清奔控獲免爭持

金帛走謝辭不受時避地者建德尹楊瑀平江尹貢師

泰建德通守毛景賢咸依以清男女未婚嫁者皆爲擇

配瑀卒貧不能斂以清葬以禮同門友胡方死無子躬

爲斂藏藉遺物歸其弟妹浙省員外王國賢以囊橐留

清所國賢死完歸其家淮南江浙聞其風辟命交至皆不赴晚築室蕭塘遠迹城府躬耕以食一時士大夫皆

慕之如古人云

顧志節義

周顯字光遠華亭人世居于山負奇氣涉獵經史閒喜神仙家言丁父憂哀毀骨立三年不與燕樂奉母孫氏尤謹所居里歲輸官租四萬石民困重斂多負逋慢期顯具爲約遂無敢後者吳松江故道塞詔所司開濬御史臺分官督視僉事范某素知顯才咨以方略顯取方尺紙爲圖指畫形勢甚悉畢事御史舉酒勞曰是役君之力也先是都監與守性緩急不同言語多忤會宣撫行

松江府志

卷五十

古今人傳二

吳

郡有奸民各投牒交許受賄不法事下嘉興守杜某覆治顯曰父母有過子當力諫今以論政不合使奸民迎合詆誣吾徒奈何坐視遂詣二人備論所以皆感悟痛自責相好如初杜守聞之亦抵奸民罪貢師泰稱之曰聞義而勇不謀於人好仁而公不私其身卒年四十八

郭志獨行

朱弦字孟清上海人性孝義邑令閻九柱器之請於其父乞爲義子閻罷官貧窶弦敬養無缺沒後買山以葬之復營別室母事閻妻三十年民有賣屋償逋無所棲者弦爲贖還友人趙謨亡命教授某被召發顛疾走山中

遇弦竝脫於難上海志

瞿懿字彥德上海人霆發從曾孫也幼孤事叔如父同居三十年叔以非罪頌繫懿泣訴於官曰合坐懿叔無與官義之釋歸叔病沒復延師教其子時習仕潯州路總管妻張氏鍾氏前後事姑竝孝敬云上海志

戴光遠字君實華亭人居白牛鎮其父賜谷規創義塾以淑里人未竟而沒光遠經畫成之作堂室四十五間貯圖史延師儒招學者割常稔田五百畝贍之黃學士潛有記郭志獨行

全翁不知其名元季避兵泖濱耕田讀書為樂倪瓚慕其

松江府志

卷五十

古今人傳二

三

人訪之翁但極言好名之失且曰君輩得毋山林養望以為名高者乎瓚有愠色辭去後江南名士就徵多不免人始服翁之高今其裔為平湖陸氏婁縣志

松江府志卷五十終

